

Tgisà sche la scola separticipescha?

La Cuminonza romontscha da Flem cun interessants projects

■ (anr/abc) **Dacuort ha la Cuminonza romontscha da Flem envidau alla radunonza generala. In triep dils varga 100 commembers ha dau suatientscha.** El-la vischnaunca da Flem ha il lungatg romontsch, silmeins dalla vart ufficiala, mo pli ina muntada marginala. Tuttina entaup'ins aunc pulit bia gliעד a Flem che tschontscha romontsch. La schientscha pil lungatg ha spiars pulitamein avon rondund 20 onns. Lu haveva la Cuminonza romontscha empruau da motivar la scola communal pil lungatg oriund. Quei ei buca gartegiau lezza gada. Oz frequentan ils scolars dall'emprema e secunda classa lecziuns da romontsch, suenter ei la purschida dependenta digl interess facultativ.

Tier Gian Fontana

Igl onn 1903 haveva il cussegl da scola da Flem aboliu, sin squetsch da cercchels turistic, l'instrucziun da romontsch. Las mesiras han buca tunschiu, pertgei siat onns pli tard ha il cussegl da scola stuiu relaschar in scamond da tschintchar romontsch sin plaz scola. Era ellas radunonzas communalas han ins lu bandischau il lungatg oriund – per motivs spirtamein economics. Mo pli ellas famiglias han ins dapi lu dau vinavon il romontsch d'ina generaziun a l'atra. Il scolast Gian Fontana da Fidaz haveva entschiet a scriver ses texts per tudestg. Naven digl onn 1920 ha el dau ina viulta e scret mo pli romontsch. El s'aua oz tiels grondas poets e litterats dalla Romontschia.

A Flem ei la fontauna spel hotel Fidazerhof dedicata ad el. Era grazia alla senda linguistica per liung dalla senda panoramica da Foppa a Scheia ei Fontana memorisau alla populaziun. Ina tabla ei dedicata al poet da Flem. Era silla nova «Senda Romontscha» che la Cuminonza romontscha da Flem (CRF) ha realisau maunca quel buc. La senda tematica, in-



La suprazonza dalla CRF (da sen.): Renata Jäger, Hanspeter Meiler e Giosch Gartmann. En pei ils collaboraturs regionalis David Flepp ed Alice Bertogg.

FOTO A. BEELI

augurada igl onn 1996, consista da 30 tablas cun informaziuns dil romontsch, da sia historia, derasaziun e cultura. Igl onn vargau ei la Cuminonza romontscha da Flem sededicada ad in project da renovar quellas tablas. Margis vargau, a caschun dalla radunonza generala dalla CRF, ha la suprazonza informau surlunder. Il president Hanspeter Meiler ed il consuprastont Giosch Gartmann, assistit da David Flepp dalla Lia Rumantscha, han instradau il project. Las autoritads commu-

nalas han mussau interess per ina renovaziun dallas tablas inclus material, text e presentaziun grafica. Era l'organisaziun turistica FLFM cun siu directur André Gisler ei stada beinvulenta ed ha susteniu il product.

Contacts empermettens

Enstagl da 30 tablas consista la Senda Romontscha nova da 24 tablas. Sco Meiler han confirmau eis ei previu da presentar quella «nova» pintga attraziun da

Flem l'entschatta da zercladur 2019 alla publicitad en cumbinaziun cun ina fiastetta. Cun si'acziun da renovar la senda dat la CRF al lungatg romontsch qualitad, respect e preschientscha, e quei en in dils loghens pli frequentai sur Flem. Quella tematica ei stada el center dalla radunonza generala. Il program annual 2019 cuntegn ulteriuras activitads. Denter auter ha la CRF, accumpignada da Conradin Klaiss, il responsabel per la formaziun el directori dalla Lia Ruman-

tscha, encuretq il contact culla scola da Flem. Il meinascola Marc Cathomas ei beinvulents enviars ina collaboraziun en ina fuorma ni l'atra, medemamein Peter Reiser, il president dil cussegl da scola. Far ir anavos la roda vul evidentamein negin. La sesida communalba seigi denton stada detg prospereivla en quei senn ch'ei detti il proxim onn da scola 2019/20 eventualmein alla scola da Flem in «Gi da romontsch» ch'include la scoletta tochen il scalem superiu. Era il cant aviert che la CRF ha organisau biars onns cun Ursin Defuns e Curdin Jeitziner sepurschess el futur sco occurrenza cumineivla culla scola. Daferton spetgien ins sin ina risposta affirmativa dil team e dil cussegl da scola, han Meiler e Gartmann informau. Il meinascola ha perinagada gia reservau pliras tablas veglias dalla senda linguistica existenta, talas vulan ins montar ella casa da scola Surmir. Renata Jäger-Camenisch, la tiarza suprazonza dalla CRF, ha rapportau d'ina ulteriu' occurrenza romontscha ch'ei preveda uonn a Flem. Ils 13 e 14 da settember 2019 vegn il «mund romontsch» a sepresentar el Living Room agl 1. Festival romontsch a Flem. Yvonne Gienal e Barla Collucello ein las iniziandas da quell'occurrenza. Il festival ei cumbinaus cun prelecziuns, performances, produzioni per affons, prelecziuns e pintgas turas tras Flem. La collaboratura regionala Alice Bertogg ha presentau quellas. Ei setracta da turas cul tetel «Per gassas e streglias», en fuorma da guidadas han ils participonts caschun da s'avischnar al romontsch. La tura ei concepida sco introduziun sperta e divertenta el lungatg. Ei seigi ina purschida fetg captivonta, ha Bertogg tradiu als presents. Sco quei che la Cuminonza romontscha da Flem ha cumprovau alla radunonza generala empermettan las activitads dil proxim futur ina pulita preschientscha cun contacts e schanzas multifaras.

Negin eveniment regional

Dalla schitgira dalla stad vargada ei ina gronda part dalla hemisfera dil nord stada pertuccada

DAD ANDREAS CADONAU / ANR

■ **Il svilup climatic carmala scolaras e scolars sin via, fatschenta ils strategs dallas partidas politicas, l'agricultura e secapescha la scienza. Il margis vargau han scienzias dalla Scola tecnica federala presentau entginas enconuschientschas dalla stad vargada stada en divers graus extraordinaria.** Che la schitgira dalla stad vargada ei aunc buca dil tuttafatg magunada tradeschan las discussiuns. Scolaras e scolars inquietai dallas atgnas perspectivs futuras intimeschan quella discussiun cun demonstraziuns regularas. E la leva febra publica ha gia influenzau il secunterer dad ina part dil suveran, aschia ch'ils strategs dallas partidas politicas ein dumandai en connex cun las lecziuns federalas digl atun proxim da seposiziunar climaticamein. Empau pli datier schai momentan la schitgira dalla stad vargada a puras e purs dad ina gronda part dil Grischun. «Tonscha ei ni tonscha ei buc» ei la damonda fundamentala per biars d'els enaquella ch'els passan gi per gi en clavau e stantan visavi ad in pel fein pigiuraus considerabel. Sin la damonda actuala da biars purs e puras da cumprar ni buca cumprar fein aunc ellas davosas jamnas dil meins avrel ha la scienza probabel negina risposta. Cun la stad vargada definida sco extraordinaria ei ina gronda da scienzias dalla Scola politecnica federala bein sefatschentada. Las conclusiuns ha ina dallas perscrutadras presentau il margis vargau, tenor ina comunica-

ziun dalla Agentura da novitads svizra (sda). E tenor l'analisa dallas perscrutadras ein buca meins che 17 tiaras dalla hemisfera dil nord stadas pertuccadas dallas aultas temperaturas e dalla munconza da precipitaziuns el decuors dils meins matg, zercladur e fenadur 2018. Quei pertucca 22 pertschien dalla surfatscha cultivada ed habitada dalla hemisfera dil nord. Exminau ha la scienza datas dils onns 1958 entochen 2018 e fatg stem da schitgiras en semeglionta dimensiun sco la stad vargada els onns 2010 e 2012. Enteifer il spazi da temps avon la midada dil millenni ha ei bein dau schitgiras. Tenor las explicaziuns dalla gruppa da perscrutaziun ein quellas schitgiras stadas pli localas ed han buca pertuccau in tal spazi sco la schitgira dalla stad 2018.

Grev da segidar

Dallas consequenzas ha la geoscienziada Martha Vogel avertiu. S'augmenta il spazi da schitgiras futuras sur ina gronda surfatscha dil terren cultivau ed habitau ei sustegn limitaus davart da regiuns buca pertuccadas. Per paregl ha la scienza menziunau igl incendi d'uaul dalla stad vargada ella Scandinavia. Tiaras buca pertuccadas dad incendis han purtau agid. Pitir po secapescha la raccolta agrara sin ina surfatscha pli gronda ed effectuer in considerabel augment dils prezis da mangiativas, scriva la gruppa scientifica. La gruppa scientifica dalla Scola politecnica federala ha fatg attent alla schitgira digl onn 2010 ch'ha schau sminuir

la raccolta da graun ella Russia ed Ucraina ed effectuu in augment considerabel dils prezis da graun entochen 16 pertschien. Buca dubi lai la gruppa scienti-

fica all'enconuschientscha dall'influenza humana sin igl augment dalla temperatura cun schitgiras pli derasadas. Che quellas influenzeschan la raccolta ei

l'agricultura indigena bein conscienta. Lu serestrenscha la damonda buca pli sin cumprar ni buca cumprar fein, mobein insumma survegnir.



Ina gronda part dalla hemisfera dil nord ei stada pertuccada dalla schitgira digl onn vargau, in novum enteifer ils davos 60 onns.

KEYSTONE